

2. Raunhæft verkefni, námskeið vorið 2011

Mats- og eftirlitshlutverk skólanefnda - PISA

Niðurstöður PISA 2009 rannsóknarinnar liggja fyrir. PISA er hluti af ytra mati og eftirliti mennta- og menningarmálaráðuneytis með gæðum skóla og skólakerfis. Skólanefndin veit að í ljósi laga- og reglugerðar um mats- og eftirlitsskyldu í grunnskólum þá á skólanefndin að sjá til þess að áætlanir um nauðsynlegar umbætur í kjölfar ytra mats séu gerðar og þeim fylgt eftir. Nú er það svo að landshlutinn sem sveitarfélagið er staðsett í kemur ekki vel út úr rannsókninni svo skólanefndin fer þess á leit við Námsmatsstofnun að fá sendar niðurstöður sem varða skóla sveitarfélagsins. Þegar skólanefndin hefur fengið þær niðurstöður í hendur kemur í ljós að lesskilningur nemenda í sveitarfélaginu er undir meðallagi og læsi þeirra á náttúrufræði líka.

Í ljósi þess meginhlutverks skólanefndar að fylgjast með framkvæmd náms og kennslu í sveitarfélaginu og gera tillögur til skólastjóra og/eða sveitarstjórnar um umbætur á skólastarfinu þá telur skólanefndin sér skylt að bregðast við á einhvern hátt. Ennfremur hefur sveitarfélagið sett sér það markmið í skólastefnu sinni að skipa sér í fremstu röð á landsvísu þegar kemur að frammistöðu og árangri nemenda og til að ná því er ljóst að það þarf að herða róðurinn.

Með skýrslunni frá Námsmatsstofnun kom bréf til skólanefndarinnar þar sem henni var boðið að fá fulltrúa frá Námsmatsstofnun til sín til að kynna frekar þessar niðurstöður og fara yfir stöðu skólanna. Ennfremur býðst Námsmatsstofnun til að gera samanburð við niðurstöður sömu nemenda á samræmdum prófum 10. bekkjar í íslensku og stærðfræði. Skólanefndin ákveður að nýta sér þessa þjónustu og boðar til fundar með fulltrúum Námsmatsstofnunar og grunnskólastjórum í sveitarfélaginu. Niðurstaða þess fundar er að það þurfi að grípa til markvissra aðgerða til að bæta frammistöðu nemenda í íslensku og náttúrufræði.

- Hvernig tekur skólanefndin á málinu í framhaldi af þessum fundi?
- Við hvaða aðila ætti skólanefndin að hafa samráð til að koma af stað umbótum í framhaldi af upplýsingum sem fram komu á þessum fundi?